

ՄԵՐ ՀՈՐԵԼՅԱՐՆԵՐԸ

ԱԶՆԻՎ ՊԵՏՐՈՍԻ ՊԵՏՐՈՍՅԱՆ

(Մենդյան 70-ամյակի առիվ)

Ազնիվ Պետրոսյանը ծնվել է 1903 թվականին Վանում, արհեստավորի ընտանիքում. մանկությունը անց է կացրել սուլթանական ռեժիմի պայմաններում, 6 տարեկան հասակում հորից սրբացել, 12 տարեկանում թուրքական յաթաղանից ճողոպրած դարձել է դաղթական և միաժամանակ մորից սրբացած: Այնուհետև մինչև 1921 թ. ապրել է որբանոցներում: 1921—1925 թվականներին Սովետական Հայաստանի անդրանիկ բարձրագույն դպրոցի՝ Երեվանի սկսական համալսարանի ուսանող և նրա անդրանիկ շրջանավարտը 1925 թվականին:



Աշխատանքի է անցել 1921 թվականին, նախ որպես գրասենյակային աշխատող, 1923 թվականից գիտական հիմնարկում լաբորանտի, ասիստենտի, կրտսեր սուպ ավագ գիտաշխատողի պաշտոններով: 1940 թվականին գիտությունների թեկնածու, 1957 թվականից պիտուիայի դոկտոր, Հենինի շքանշանակիր (1955 թ.), հանրապետության գիտության վաստակավոր գործիչ, ՍՍՀ կուսակցության անդամ (1942 թ.), բյուրեղային մաքրության ազնվագույն հասարակական գործիչ:

Դեռևս 2-րդ կուրսի ուսանողուհի Ա. Պետրոսյանն իր ընդունակություններով և աշխատասիրությամբ գրավեց պրոֆ. Պ. Բ. Քալանթարյանի ուշադրությունը: Մեր հողն ու ջուրը լավ իմացող Քալանթարյանը գիտակցում էր, որ սակավահոգ Հայաստանում պետք էր բարձրացնել հողի արգավանդությունը և քերթատվությունը: Հողի բերրիության բարձրացման համար անհրաժեշտ էր

ներթափանցել մեր հողերի քիմիական բաղադրությունը և նրանցում կատարվող կենսաբանական պրոցեսների մեջ (հիմնել ագրոքիմիական և հողի մանրէա-կենսաբանությունը), որպեսզի կարելի լիներ ղեկավարել հողի բերրիության այդ կարևորագույն լծակները: Բազմափաստակ գիտնականը ուրիշների թվում ընտրեց նաև Ա. Պետրոսյանին: Աշակերտելով Քալանթարյանին Պետրոսյանը դարձավ իր ուսուցչի լավագույն փոխարինողներից, գիտական ժառանգորդներից, մինչև կյանքի վերջը նրա երախտապարտ աշակերտներից մեկը: Եթե պրոֆ. Պ. Բ. Քալանթարյանը եղել է Հայաստանում ագրոքիմիական գիտության և հողի մանրէակենսաբանության հիմնադիրը, ապա այդ հիմքի անկյունաքարերից և ամբողջական շենքի հիմնական սյուներից մեկն է եղել Ա. Պետրոսյանը:

Ա. Պետրոսյանի գիտական գործունեության ուղղությունը շատ ճիշտ և մտածված է ընտրվել: Դեռևս 1920-ական թվականներին գյուղֆակի ուսանողների մասնակցությամբ պրոֆ. Քալանթարյանը կազմակերպեց առաջին պարտադրման դաշտային փորձերը հանքային և տեղական պարարտանյութերի հետ. նորաստեղծ Կենտրոնական քիմիական լաբորատորիայում պրոֆ. Ստ. Պ. Ղամբարյանի ցուցմունքներով Ա. Պետրոսյանը հողվածագրիս հետ տիրապետեց և կատարեց հողերի և մի շարք բույսերի ագրոքիմիական առաջին անալիզները: Կելլդալի մեթոդով ազոտի որոշման աշխատանքները կատարվում էին նավթայրիչի և Ազնիվի եղբոր՝ Արծրունու ինքնաշեն «չիժիկների» վրա: Այդ փորձերից և անալիզներից պարզվեց, որ Հայաստանի երկրագործական շրջանների հողերում բերքատվության գործոններից նվազագույնը ազոտն է: Պահանջվում էր հարստացնել մեր հողերը ազոտով:

Այդ պրոբլեմը լուծելու համար Քալանթարյանը աշխատանքները կազմակերպեց երեք ուղղությամբ. նախ՝ պահանջվեց առավելագույն չափով կուտակել, ճիշտ պահպանել և կիրառել տեղական-օրգանական պարարտանյութերը: Երկրորդ՝ հանրապետությունում հիմնել առաջին հերթին ազոտական, ապա նաև ֆոսֆորական պարարտանյութերի արտադրությունը, որը կենսագործվեց Կիրովականում և Ալավերդիում և վերջապես երրորդը՝ ուժեղացնել մեր հողերում օդի ազոտի կենսաբանական ֆիրսացիան՝ պալարաբակտերիաների և ազոտաբակտերի գործունեությունը: Քալանթարյանը այդ աշխատանքները բաժանեց իր աշակերտների մեջ. զրանցից Ա. Պետրոսյանին և նրա ղեկավարությամբ գործող խմբին հանձնարարվեց ուսումնասիրել Հայաստանում մշակվող թիթեռնածաղկավորների պալարաբակտերիաների վիրուլենտությունը և ակտիվությունը, ազոտ ֆիրսելու ունակությունը, առանձնացնել և բազմացնել նրանց առավել ակտիվ ցեղերը: Ավելի քան 30 տարիների ընթացքում Պետրոսյանի աշխատանքը փայլուն կերպով լուծեց այդ հարցը, նրա մեկուսացրած պալարաբակտերիաների էկոլոգիական տիպերը ճանաչվեցին որպես ամենատարածվածները: Դրանց հիման վրա 30-ական թվականներին գյուղինստիտուտի բակում տնայնագործական ճանապարհով արտադրվեցին մի քանի տասնյակ հազար հեկտարաբաժին նիտրադին՝ կորնզանի, աուվույտի, երեքնուկի, սիսեռի, լոբու և այլ կուլտուրաների համար: Նիտրադինի փորձարկումները արտադրության մեջ տվեցին փայլուն արդյունք: Այդ տվյալների հիման վրա հիմնավորվեց և ստեղծվեց Երևանի բակտերիական պարարտանյութերի գործարանը, Սովետական Միության մեջ առաջնեկներից մեկը: Ազնիվ Պետրոսյանը մինչև իր կյանքի վերջը եղավ այդ գործարանի գիտական խորհրդատուն:

Ա. Պետրոսյանի ղեկավարական դիտարկումների «Հայկական ՍՍՀ-ի պալարաբակտերիաների էկոլոգիական առանձնահատկությունները» թեմայով, փայլուն պաշտպանեց և ստացավ լավագույն գնահատականը (1957 թ.): Այդ դիտարկումների նյութը հետազայում (1959 թ.) լույս տեսավ որպես մենագրություն՝ ՍՄԳԱ թղթակից անդամ պրոֆեսոր Ն. Ա. Կրասիլնիկովի խմբագրությամբ: Մենագրությունը նվիրված է հեղինակի ուսուցչի, պրոֆեսոր Պ. Բ. Քալանթարյանի պաշտոն հիշատակին:

Մեծագույն բարեխղճությամբ և զարմանալի խորությամբ է կատարել իր հետազոտությունները մանրէաբան դիտականեր:

Մենագրության 60-րդ էջում կարդում ենք «նույն թիթեռնածաղկավոր բույսի տարբեր սորտերը միատեսակ ուժգնությամբ չեն վարակվում պալարաբակտերիաների նույն շտամմներով... միևնույն սորտից անջատած պալարաբակտերիաները իր իսկ սորտի համար առավել վիրուլենտ են, քան ուրիշ սորտերի համար»: Գիտնականը ուսումնասիրել է նաև պալարաբակտերիաների էկոտիպերի ներտեսակային և միջտեսակային փոխհարաբերությունները, ինչպես նաև թիթեռնածաղկավոր բույսերի զարգացման ֆազերի և հասակի ազդեցությունները պալարաբակտերիաների ակտիվության վրա:

Պետրոսյանն իր շրջադայությունների ընթացքում նաև ստուգում էր նիտրագինի կիրառման արդյունավետությունը: Պետք էր տեսնել թե ինչպես էր հուզվում, երբ մի շարք տեղերում ճիշտ չէին պահպանում նիտրագինի, այդ «կապրիզավոր» էակներ պարունակող պարարտանյութի կիրառման պայմանները:

Պետրոսյանը ամենաակտիվ մասնակցություն է ունեցել միութենական, ռեգիոնալ, հանրապետական գիտական նստաշրջաններին, բազմիցս հանդես է եկել հանրապետության շրջաններում ու գյուղերում, մամուլում ու ռադիոյով իր մասնագիտությանը առնչվող դործնական-կիրառական զեկուցումներով, զրույցներով:

Շնորհիվ Ա. Պետրոսյանի բեղմնավոր գիտական գործունեությանը Հայաստանը ճանաչվեց որպես պալարաբակտերիաների կենսաբանական գիտության կենտրոնը Միության մեջ:

Փոքր չեն նաև Պետրոսյանի ծառայությունները մանկավարժության և փոխարինող գիտական կադրեր պատրաստելու բնագավառում: Քսան տարի (1932—1952) նա դասախոսել է Նրեանի պետական համալսարանում իր սիրած առարկան, ղեկավարել է ասպիրանտների, որոնք հաջողությամբ պաշտպանել են դիտարկումները: Ա. Պետրոսյանը ԳԱ կենսաբանական բաժանմունքի գիտական խորհրդի ամենաակտիվ անդամներից մեկն էր: Նա պաշտոնական կամ անպաշտոն մշտական խորհրդատու էր բոլոր նրանց, ովքեր դիմում էին նրան ամենատարբեր հարցերով:

Ավելի քան 60 գիտական աշխատությունների հեղինակ Ազնիվ Պետրոսյանը միկրոբիոլոգ էր, բայց ցուցաբերեց իր մակրոբիոտական և Մեծ մարդ լինելը: Ագրոքիմիկոս և միկրոբիոլոգ Պ. Բ. Քալանթարյանի հիմնած գյուղատնտեսության միկրոբիոլոգիական գիտության ճյուղը, որին իր ամբողջ փայլուն կյանքը մինչև վերջը տվեց Ազնիվ Պետրոսյանը, պետք է զարգացնել ԳԱ միկրոբիոլոգիական ինստիտուտում և դա կլինի ամենալավ հուշարձանը այդ համեստ բայց մեծ մարդ-գիտնականի փայլուն հիշատակին: